

Karasia

Pauru okusiwa Karasia wānà kō pè maekwerà

Imovyvya

Aã kareta Janejare'e Āg omotekokuwa Pauru tokusiwa Karasia yvy wānà kō pè maekwerà. Janejare'e tē opyteporo Pauru, Juteu rōwā mē kō motekokuwaarà rōmō toiko. A'e wemikusiwarerà omonooka Jesu koty rewarà kō pè tomā'ē ee, Karasia yvy wānà kō pè. Wemikusiwarerà rupi tē omotekokuwa kō, tojmoripeoka e'ā Janejare'e ayvu rē poromo'e rā'āga mē kō ayvu pè. Kee rewarà mō. Akypyre kyty Juteu kō mō oo Karasia yvy kyty remē. Āmō rupi tē omo'e Jesu koty rewarà kō a'e pè āmē kupa ky'y. Kee e'i tite Jesu koty rewarà pè: "Tāmō Moisesi remikusiwarerà rupi katu jaiko remē tē katu Janejare'e janerereko katu kuwa ipi, āwisō ipyri tijaiko", e'i tite kupa (J.K.R. 15.1-35). Karasia wānà kō pè aepe e'i kupa. "Aje ipō" e'i tite Karasia wānà kō mō āmē, ijayvu kō renu. A'evo ojireko tite āmē kupa, ijayvu kō rupi. Ajaire a'evoa ojenu Pauru pè remē, ijayvukasi imono okareta rupi ijupe kō.

Kee e'i Pauru ikusiwa imonooka. "Ajawyi ije rōwā maevo sō tite epirā pupe aiko ky'y. Kiristu tē epirā pupe ekoī mā'ē vo 'ejē ije aiko ky'y. A'e rē ajirovija aiko, ajuve jē aiko remē. Janejare'e Ra'yry rē tē tesō ajirovija aiko ipi. Erauvay wyi omānō eupewarà mō mā'ē tē a'e", e'i ikusiwa (Kar. 2.20).

Pauru ojikuwatà ijupe kō mā'ē

- 1** Ije, Pauru, Jesu remimonokwerà tē. Mirà kō remimonokwerà rōwā ije. Mirà kō remipyteporokwerà rōwā teve ije. Aje ywete Jesu Kiristu tē epyteporo. Āmō, Janejare'e teve, a'e Jesu Ruu tē. A'e tē Jesu omānō maire omomoera mā'ē.
- 2** Jesu koty rewarà kō jimoatya Karasia yvy rupiwarà kō pè aã kareta akusiwa ajupa. Kee a'e pejē. Pirujē epyriwarà kō opota ojimory pene, eremikusiwarerà rupi.
- 3** Janeruwasu ikō tapenereko katu okatuaya rupi nē. Tapepy'amopiryvypy katu penereko ipi. Āmō, Janerōvijā Jesu Kiristu teve ikō a'evo tapenereko nē, a'e pejē.

⁴Kiristu itōkō omānō yvyra jipokana rē janeaiwererā repykarā rōmō. Omānō mēe rā teāmā uu janeaiwererā repykarā rōmō. A'evō janemomoioka janeaiwererā kasia pe wyi, janeremimota ai kasia pe wyi. Janeruwasu ayvu rupi a'evō Jesu janerereko, Uu remimota rupi tē. ⁵Janejare'e ywesō ikatuay wete iko. Ajawyi tisimoe'e py'yi jaiko ipi. Ōō, awyje katu āwīvo jamoe'e karuaru jaiko ipi.

“Pe'ite Jesu ayvu”, e'i mā'ē

⁶Kee a'e pejē. Ajimonyi tesō pene aiko! Pepyteporoarērā wyi kuisse'ēay wete pepoipa ywe'e tite, āwisō Janejare'e penaavay ipe remē! Penaavay wyi Kiristu omuu ipe penekovijarērā rōmō tomānō, peaiwererā repykarā rōmō! Kuisse'ēay pepoi ywe'e tite Janejare'e morya wyi ajamā'ē! Āmō kō ayvu ywesō peenu katu ywe'e tite peiko, Janerōvijā ayvu katu wyi! [A'e kō itōkō kee e'i tite: “Tapejimojuteu rā'ī ajamā'ē!” e'i tite kupa.^a Aepo jaa peenu remē, “aje” pejē ywe'e tite enu. Pejimojuteu ywe'e tite peiko āmē ky'y.] Ajawyi ajimopirai 'ete aepo renu penewarā rē.

⁷[Kee pejē tite sipō peiko? “Oiko ipō āmō ayvu, a'e ywesō Janerōvijā Kiristu ayvu wyi”, pejē tite si peiko? “Ivo pōkō Pauru janemotekokuwa mijā?” pejē teve rōwā pōkō peiko? Ānī!] Aje, oiko pe'ite Kiristu. A'e rupi rōmō'ite jajimory kuwa Janejare'e rē jaiko ipi. Āmō, aje ywete, Kiristu ayvu rōmō'ite poromotekokuwa mā'ē. Aje, naikoi āmō upi tijaiko mā'ē. Ajamā'ē pejē, āmō kō ayvu rupi pevote peiko teitete peiko ky'y. Āmō rupi teve Kiristu rekoa omojenu rā'āga peupe kupa ipi. Ovo rupi teve oreayvu poromotekokuwa remē ajamā'ē.

⁸Ivo katu itōkō oromojenu Janejare'e ayvukwerā pejē. Ajawyi kee a'e pejē. Ava mō sō āmō rupi tē omome'u, oromojenu maekwerā vo rōwā remē, Janejare'e ikō tomomorijau nē! a'e pejē āmē. Nivoi mēe kō momorijau rena pē ikō tomomorijau nē, a'e. Janejare'e remīgwai yvapewarā teipe teve sō āmō rupi tē omotee tite ijayvu imojenu remē, Janejare'e ikō tomomorijau teve ikenē. Ore ve sō nivoi oromojenu tite remē, ore ve Janejare'e toremomorijau ve āmē! Ajawyi aepo a'e eayvukasi rōmō pejē. ⁹Aepo oro'e tarā mijē pejē, tapetekokuwa ee. Ipojy Jesu ayvu rē poromo'e rā'āga mēe kō remimojenuwerā! Ajawyi oreayvu vo rōwā sō emimojenu kō remē, Janejare'e tomomorijau kō! oro'e pejē.

¹⁰Pemorya rōmō rōwā eayvukasi imono pejē! Janejare'e morya rōmō tē a'evō aiko. Aje ywete mā'ē rē tē kōrijō tē poromo'e aiko. Ajawyi aepo a'e imono pejē. “Emoe'e kuwasi kupa!” na'ei pejē ajamā'ē. Janejare'e morya ywesō aārō mirā kō morya wyi ipi. Nāwīvoi sō aiko remē, Kiristu remīgwai e'e rōmō rōwā kuwa ije āmē aiko mijā.

^a 1.6 Kee jaa tē e'i tite kupa mā'ē: “Napejimosipire'oi sō remē, Janejare'e napenereko'āi opyriwarā kō rōmō. Jesu rē jirovijaa kōrijō tē nikasi”, jaa tē e'i tite kupa mā'ē. Pirujē Moisesi remikusiwarerā rupi katu toiko āmē kupa.

“Janejare'e 'Āg tē emotekokuwa mā'ē”, e'i mā'ē

¹¹ Kee a'etā pejē, eretārāgwerā kō. Eayvu Jesu Kiristu rē promotekokuwa mā'ē aje ywete ipi. Mirā kō rōwā emotekokuwa Kiristu rē. ¹² Aje Jesu Kiristu tē tesō emotekokuwa wee erereko, omojikuwaoka wayvu ije remē. Mirā rōwā emotekokuwa erereko. Ajawyi eremimojenu Kiristu rewarā aje ywete ipi, āwisō Kiristu tē emotekokuwa remē.

¹³ Erekoawerā pekuwapa. Jypy remē itōkō amomorijau tesō Jesu koty rewarā kō aiko maekwerā pekuwapa. Orerāmōi Juteu kō ayvu rupi jē aiko remē itōkō, a'evo aiko ipi mijā. Aa aa itōkō Jesu koty rewarā kō reka imojaiwe kō ipi mijā. Apota itōkō pirujē imoma kō tite ipi mijā. Naporijauesa kōi wete mijā! [Kee a'e tite mijā: “Janejare'e opota a'evo taiko ipi”, a'e tite mijā.]^b ¹⁴ Ajimokasiay ipe itōkō Janejare'e morya rē ipi mijā. Ije ywesō kō a'evo aiko ipi mijā mā'ē, eakatarā kō wyi. Ije ywesō tāmō kō rekoawerā rupi katu aiko ipi mijā, Juteu e'ey rōmō. “Janejare'e morya rōmō aiko”, a'e tite mijā. Ajawyi a'evo aiko ipi mijā. Najavyi tite itōkō tāmō kō rekoawerā ipi mijā.^c

¹⁵⁻¹⁶ Ajamā'ē Janejare'e epyteporopa teāmā sikaepo wemīgwai rōmō taiko. A'evo aiko rewarā mō rōwā epyteporopa. Erereko katu okatuaya rupi rewarā mō tē epyteporo. Nesakyi remeve epyteporo teāmā erereko. Aja paire kō Janejare'e Wa'yry omojikuwaoka ije. Opota rewarā mō tē a'evo erereko. Emoteeoka āmē ky'y. Ejipy'amogetaa omotee teve. Ajaire emono Juteu rōwā māe kō pē, tamotekokuwa kō ijayvu e'ey Jesu Kiristu rewarā rē, āwisō tojirovija ee kupa. A'evo remē naporanui rā'ī mirā kō pē temotekokuwa rā'ī Jesu rekoa rē, taa Juteu rōwā māe kō motekokuwaarā rōmō aiko.^d ¹⁷ Āmō, Jerusarē taa pē naai rā'ī teve aporegeta Jesu remimono ppykwerā kō pē. “Mirā kō temotekokuwa rā'ī”, na'ei. Oterē jē kōrijō aa Arapia vyv kyty. Janejare'e rōmō'ite emotekokuwa a'e pē aiko remē, āwisō Juteu rōwā māe kō rena pē aju remē. Aja paire ajivy aa Tamasiku taa kyty ky'y.^e

¹⁸ Aja paire tē kō aa Jerusarē taa kyty Peturu pē aporegeta ky'y. Moapy kwaray paire tē a'evo aiko. Āmē, a'e pē 15 'arā rōmō kōrijō tē aiko rā'ī aporegeta eeve.^f ¹⁹ Namā'ēive Jesu remimonokwerā kō mō rē mijā, Peturu vo mā'ē rē. Āmō, Tiaku rē amā'ē a'e pē aiko remē. A'e Janerōvijā ywete mōmirīgwerā tē. A'e kō rē rōmō'ite amā'ē. ²⁰ Ajawyi Janejare'e kōrijō tē emotekokuwaarerā, a'e pejē. Aje ywete aepe a'e aporegeta Janejare'e rovake. Ajawyi āwī eremikusiwarerā pē “aje” taoty mājā ipi. A'evoa Janejare'e okuwapa.

^b 1.13 J.K.R. 8.3; 22.4-5; 26.9-11 ^c 1.14 J.K.R. 22.3 ^d 1.15-16 J.K.R. 9.3-6; 22.6-10; 26.13-18 ^e 1.17 Kee jaa tē aepe e'i Pauru mā'ē: “Naikoi Jesu remimonokwerā kō mō a'e pē. Ijekwerā tē. Ajawyi ava mō, “Jane mō remimotekokuwakwerā tē āwī”, ne'āi kuwa ije. Aje, Janejare'e remimotekokuwakwerā tē ije”, jaa tē. ^f 1.18 J.K.R. 9.26-30

²¹Aja paire Jerusarē pe wyi Sirija vvy kyty aa, Juteu rōwā mǎe kō vvy kyty. Āmō, Sirisi vvy kyty aa. A'e pè teve taa taa kō rupi aa aa aiko. Juteu rōwā mǎe kō pyterà rupi ywesō akwa āmē. ²²Ajawyi Kiristu koty rewarà kō Juteja vvy rupi ojimoaty mǎe kō nekuwai mijā, a'evo aiko remē. ²³Āmō kō ayvukwerà rupi kōrijō tē erekoa okuwa kupa ipi, kee e'i kupa mǎe rupi: “Āwī Pauru mirà kō omomorijauvay maekwerà tē, age'e ojimoteepa ky'y. Awyje Jesu ayvu rupi tekoua rē poromotekokuwa e'e iko ky'y! Āwī itōkō jypy remē opota Jesu rē ojirovija mǎe kō moma tite maekwerà tē!” e'i mǎe. Aepo jaa rupi tē ekuwa kupa.

²⁴Āmē aepo jaa wenu kupa remē, kee e'i Janejare'e pè imoe'e erewarà mō kupa: “Janejare'e, nekatuay wetea rupi Pauru nepyteporo neremīgwai rōmō imotekokuwa ky'y!” e'i kupa. [Ajawyi “aje ywete” tapejē ije ky'y.]

“Aje ywete Janejare'e remipyteporokwerà tē Pauru”, e'i kupa remēwarà
(*Jesu koty rewarà kō 15.2-35*)

2 ¹Ijaty kwaray itōkō naai mijē Jerusarē taa kyty. 14 kwaray rōmō tesō naai ajupa. Ajawyi, 14 kwaray paire tē aa mijē Jerusarē taa kyty ky'y. Panape araa erupi. Āmō, Titu araa. Mokepejō araa. ²Janejare'e tē omojikuwaoka eopa ije. Ajawyi tē aa Jesu koty rewarà kō rōvijāgwerà resa ky'y. Āmē orojimoaty a'e pè remē, amome'u ijupe kō manyvo areko Juteu rōwā mǎe kō motekokuwa Kiristu rē jirovijaa rā rē. Jane kō rovake rōwā a'evo aiko amome'u. Waiteve aporegeta eeve kō. [Kee a'e aporegeta ijupe kō: “ ‘Tapejimojuteu rā'ī, na'ei Juteu rōwā mǎe kō pē ajamā'ē. ‘Tapejimosīpire'ooka rā'ī imojikuwaparà rōmō', na'ei teve. I'ete pō aepo a'e ijupe kō?” a'e ijupe kō. “Ivo katu pō amotekokuwa kō?” a'e. “Nivoi pōkō ma'e reme amotekokuwa remē?” a'e ijupe kō.] Nivoi amotekokuwa kō sō remē, manyvo jaa rōmō rōwā kuwa eposikoa āmē mijā. Ajawyi aepo a'e ijupe kō. [Āwijā pē kee e'i ije kupa: “Ivo katu tē nemotekokuwa kō”, e'i ije kupa.] ³Juteu rōwā teipe ejimorypa Titu. Kereku vvy wānà teipe. Ajamā'ē Jesu koty rewarà rōvijāgwerà kō noemosīpire'ookai ajamā'ē. Nopotai sō eposikoa kupa remē, wemosīpire'ooka kuwa āmē kupa mijā.

⁴Ajamā'ē Juteu kō mō opota rā'āga tite Jesu remīgwai rōmō ekoi mijā. Jesu koty rewarà rōvijā kō rōwā a'e kō ajamā'ē. A'e kō orerevejē ojimoaty kupa mijā. Opota tē oreayvu renu tē sikaepo kupa mijā. Kee e'i rā'āga ore kupa: “Ore teve Jesu koty rewarà kō rōmō oroiko”, e'i rā'āga ore kupa. Ajamā'ē ojimoaty orereve kupa remē, opota wāmōi kō rekoawerà rupi toroiko kupa mijā.⁸ Kee e'i epe ore kupa: “Manyvore pō Kiristu Jesu rē pejirovija ky'y remē, tāmō kō ayvukwerà rupi napeikoi sō ky'y?” e'i kupa. Āmō, kee e'i epe teve ore kupa: “Tāmō kō ayvukwerà rupi jē peiko remē

§ 2.4 Maevo opota Titu remosīpire'o kupa mijā.

tè ikatutà oreupe”, e'i epe teve kupa. ⁵Ajamã'ê “aje” noro'ei ijayvu kō pè. Noropotai Jesu ayvu moteea, ajawyi. Oropota Jesu ayvukwerà aje ywete mǎ'ê mojenu pejê. Ajawyi “aje ywete” noro'ei ijupe kō.

⁶Jesu koty rewarà rōvijāgwerà kō ãmê oreayvu wenu remê, “aje” e'i ore ãmê kupa. ãwisō jōvijā kō teipe kupa remê, ajamã'ê najirokyje ekōjēi iwyi kō. Janejare'e pè ojevo jê jaiko Jesu koty rewarà kō rōmō jaiko. Aje, janepy'a rē ywesō omã'ê ipi. Ajawyi a'e kō ywesō rōwātà Janejare'e pè ekoi, jōvijā kō rōmō teipe ekoi kupa remê. A'e kō ve nomoteei oreayvu poromotekokuwa ee mǎ'ê, oroo esa kō remê. ãmō rupi tē rōwā oreinō kupa. ⁷Ajamã'ê kee e'i jōvijā kō ije: “Aje ywete Janejare'e tē nemonooka Juteu rōwā mǎe kō teremotekokuwa ijayvu e'eay Jesu Kiristu rewarà rē”, e'i kupa. “ãwitō Peturu Juteu kō motekokuwaarà rōmō ekoi, ãwivo ve ene, Juteu rōwā mǎe kō motekokuwaarà rōmō neiko”, e'i kōrijō ije kupa.

⁸Aje ywete Janejare'e tē okasia rupi epyteporo emono Juteu rōwā mǎe kō motekokuwaarà rōmō taiko. ãwitō Peturu omokasi imono Juteu kō tomotekokuwa, a'evō ve emokasi emono Juteu rōwā mǎe kō tamotekokuwa. ⁹Kejō jōvijā kō: Tiaku. Peturu. Juwāo. Mokojejō. A'e kō kee e'i ore Janejare'e kasia rupi: “Aje ywete, orevo mǎ'ê tē pejê, Jesu remigwai kō rōmō”, e'i ore Panape reve kupa. Ajawyi kee e'i ore kupa: “Aje ywete, pejê Juteu rōwā mǎe kō motekokuwaarà tē. Orevo ve pejê. Juteu kō motekokuwaarà rōmō tē teve ore”, e'i ore. Ajawyi a'evō rē orojiayvume'ê ojiupe. Ojimory katu orere kupa. ¹⁰Ajamã'ê kee e'i kōrijō ore kupa: “Uve ike rupi Jesu koty rewarà kō, iporijau mǎe kō. A'e kō tapepātavō ipi”, e'i. “Hoō” a'e ãmê. ãwivo aiko teãmā. ãwivoa rē poromotekokuwa teãmā teve aiko.^h

Pauru ijayvukasi Peturu pè remēwarà

¹¹ãmê ajaire Peturu uu ãtiokia taa kyty, orekoty. Aekwery vo rōwā ekoi Peturu ãmê ky'y. Jesu koty rewarà kō rōmō teipe ore pirujê mijā. Ajamã'ê Peturu nojimory katui Juteu rōwā mǎe kō rē ky'y, ãwisō Jesu koty rewarà kō teve ipe kupa remê. ãmō kō vo 'ejê wereko kō ky'y. Ajawyi aporegeta kasi Peturu pè ky'y. ¹²Kee ekoi ipi mijā. Juteu rōwā mǎe kō reve ojimi'u katu ipi mijā, Jesu koty rewarà kō reve. Ajaire Juteu kō mō ve uu orekoty. Kee e'i kupa: “Tiaku oremuroka”, e'i kupa. Kee e'i tite kupa: “Tojimojuteu rǎ'ĩ kupa. Tojimosĩpire'ooka kupa, Jesu koty rewarà mojikuwaparà rōmō toiko kupa”, e'i tite kupa. ãmê a'e kō ovãe remeve, Peturu nojimi'ui Juteu rōwā mǎe kō reve ky'y. Waite ojimi'u ky'y. Juteu kō reve kōrijō tē ojimi'u ky'y. Okyje wetārāgwerà kō wyi. Nopotai kee e'i ijupe kupa: “Tāmō Moisesi remikusiwarerà neity”, te'i ijupe kupa. Ajawyi a'evō ovake kō ekoi. A'evō ekoi remê mōrijō pee rupi oo mǎ'ê vo 'ejê ekoi.

^h 2.10 J.K.R. 11.29-30; Rom. 15.26; 1Kor. 16.1-4; 2Kor. 8.1-4; 9.1-5

¹³Ajaate ãmõ Jesu koty rewarà kô ve Peturu vo ve ekoi ky'y, Juteu kô. Juteu rôwã mãe kô pyri nojimi'ui ãmẽ kupa ky'y. Okyje Juteu kô wayvunõa wyi, ajawyi. Panape ve tesõ itôkõ ojimoane'e jê tesõ a'evoa rè, Peturu vo jê.

¹⁴Kee jaa okuwapa ipe kupa mijã: “Janejare'e janerereko opyri remê, Jesu rè jajirovija remê tè a'evo janerereko ipi. Jesu omãnõ janeupewarà mõ wyi tè a'evo janerereko”, jaa. Aepo jaa okuwa ipe kupa mijã. Ajamãê jimi'ua rè oja'a jê kupa ipi. Ajawyi Juteu kô pyri kôrijõ tè ojimi'u tite kupa ky'y. Kee jaa tè a'evo ekoi kupa: “Juteu kô kôrijõ tè Janejare'e wereko ipi”, jaa tè. Amãê ee kô, a'evo ekoi kupa remê. Ajaate eayvukasi Peturu pè ky'y. Apõã tesõ eayvukasi rômõ ijupe. Kee a'e ijupe: “Ene Juteu e'e ywete! Ajamãê ike rupi neiko ppy remê, Juteu kô rekoa rupi rôwã neiko ipi mijã. Juteu rôwã mãe kô rekoa rupi tè neiko mijã. Age'e Juteu kô rekoa rupi neiko ovake kô ky'y. Kee jaa tè ãwivo neiko mãê: ‘Juteu rãmõi kô rekoawerã rupi tè tapeiko ky'y, Jesu koty rewarà kô rômõ peiko remê’, jaa tè ãwivo neiko!” a'e Peturu pè. Pirujê teminu rômõ aepo a'e.

**“Tãmõ Moisesi remikusiwarerã rupi tekoua
nijanemokatu kuwa'ãi”, e'i mãê**

¹⁵Aje ywete ore Juteu kô tè, Juteu rômõ tè oresaky rewarà mõ. Ajawyi tãmõ Moisesi remikusiwarerã ivo tekoua rewarã rupi oroiko teãmã ipi. Juteu rôwã mãe kô rekoa rupi rôwã oroiko ipi. “Nivoi mãe kô”, e'i teãmã Juteu kô ãmõ kô pewarã mõ ipi. Ajawyi ije ve aepo a'e ipi mijã. ¹⁶Ajamãê kee orokuwa Juteu kô rômõ ky'y, Jesu Kiristu rè ojirovija mãe kô rômõ jaiko remê. Mirã kô, pirujê nivoi ekoi mãe kô tè. Ajamãê aje ywete Jesu Kiristu rè jajirovija remê tè katu kuwa Janejare'e opota tè kuwa janere ojimory! Ajamãê kee eu remê, awyje nivoi mãê rômõ jaiko jêta ãmê: “Tãmõ Moisesi remikusiwarerã rupi tè taiko ikenê”, eu remê. Janejare'e omo'y jê janeaiwererã janere ãmê. Ajamãê Jesu Kiristu rè jajirovija remê, ivo katuay mãê rômõ janerereko ky'y. Tãmõ Moisesi remikusiwarerã ivo tekoua rewarã rupi katu jaiko rewarã mõ rôwã a'evo janerereko. Aje ywete Kiristu Jesu rè jajirovija rewarã mõ tè a'evo janerereko ipi.ⁱ

Janejare'e rè jimorya rewarã

¹⁷Ore, Juteu kô rômõ, oropota tè Janejare'e ivo katuay mãê rômõ orerereko Kiristu revejê oroiko mãe kô rômõ. Ajawyi orokuwa nivoi mãe kô rômõ oroiko teãmã. Tãmõ kô ayvu rupi noroikoi sire'e. ãwivo oroiko remê, orojikuwaoka nivoi teãmã mãe kô rômõ tè ore. ãwitõ pejê Juteu rôwã mãe kô rômõ nivoi mãe kô rômõ tè peiko teãmã, a'evo ve ore oroiko Juteu kô rômõ. Ajamãê kee taoty e'ã: “Kiristu janemoane'e nivoi tijaiko”, taoty e'ã. ãnĩ! Janevota nivoi jaiko ipi!

ⁱ 2.16 Jĭg. 143.2; Rom. 3.20,22

¹⁸Ajawyi nerako'i Moisesi remikusiwarerà rè ky'y. Kiristu rè tè erako'i aiko ky'y. Ajawyi manyvoa rã rômō rōwã kuwa ajirojivy erako'i mijē tãmō Moisesi remikusiwarerà rè aiko. Erako'i pãnēmusu kuwa ee, eaiwererà kō ojimo'y jē kuwa ere rewarà mō. ¹⁹Amãnō 'a tè kuwa tãmō Moisesi remikusiwarerà rupi aiko remē. Ajawyi amãnō maevo sō tite tãmō Moisesi remikusiwarerà rè aiko ky'y. Najimo'eai ee ky'y. Janejare'e remimota rupi taiko ky'y, a'e. Kiristu omãnō eaiwererà repykarà rômō vyvra jipokana rè remē, ije ve amãnō maevo sō tite eevējē.

²⁰Ajawyi ije rōwã maevo sō tite epirà pupe aiko ky'y. Kiristu tè epirà pupe ekoi mǎ'ē vo 'ejē ije aiko ky'y. A'e rè ajirovija aiko, ajuve jē aiko remē. Janejare'e Ra'yry rè tē tesō ajirovija aiko. Erauvay wyi omãnō eupewarà mō mǎ'ē tè a'e.

²¹Janejare'e pirujē opota prooreko katu okatuaya rupi ipi. Ajawyi kee na'e'āi ijupe: “Napotai Kiristu mǎnōa rupi erereko katua”, na'e'āi ijupe. Āmē ywesō si napoi'āi iwyi aiko. Ajamǎ'ē pejē, kee e'i mǎe kō vo tè pejē peiko, tãmō Moisesi remikusiwarerà rè penako'i ywe'e tite peiko remē: “Napotai Kiristu mǎnōa rupi erereko katua”, e'i mǎe kō vo tè peiko. “Manyvoa rã rômō rōwã kuwa Kiristu mǎnōa”, jaa tè a'evo peiko mǎ'ē.

“Janevote janekasia rupi rōwã jajimokatu kuwa”, e'i mǎ'ē

3 ¹Karasia vvy wǎnà kō! Napetekokuwai mǎ'ē kō vo 'ejē pō peiko! Pejimoripeoka ywe'e tite ky'y! Pekuwa ipe janeupewarà mō Jesu Kiristu vyvra jipokana rè omãnō mǎ'ē! Ije tè itōkō a'evoa rè poromotekokuwa mijā! Ivo katu itōkō poromotekokuwa aiko mijā! Ava ywesō pō pemoripe, Janejare'e ayvu wyi tapepoi!

²Kee a'e pejē. Tãmō Moisesi remikusiwarerà ivo tekoua rupi katu peiko rewarà mō rōwã Janejare'e o'Āg oinō pepy'a pupel! a'e pejē. Aje, Jesu Kiristu rè pejirovija rewarà mō tè oinō pepy'a pupe. ³I'Āg kasia rupi tè peiko mijā. Pekasia rǎ'āga rupi tè sipō pepota peiko ky'y? “Evote amorytā Janejare'e”, pejē ywe'e tite sipō peiko! Aje, napetekokuwai peiko rewarà mō aepo pejē ywe'e tite peiko ipi!

⁴Pejimomorijau itōkō Jesu rè pejirovija peiko rewarà mō mijā. A'evo remē itōkō napeityi ee pejirovijaa mijā. Aekwery vo jē kuwasi peiko mijā. Manyvoa rã rômō rōwã aekwerà, age'e ywe'e pekasia rè penako'i peiko ky'y remē! ⁵Pemǎ'ē! Janejare'e o'Āg ome'ē pejē remē, tãmō Moisesi remikusiwarerà rupi katu peiko rewarà mō rōwã ome'ē pejē! A'evo peiko rewarà mō rōwã teve okasia omojisaoka pepyterà rupi iko. Ānī! A'evo rewarà mō rōwã! O'Āg ome'ē takatu tè pejē! Ijayvu peenu remē itōkō, kee pejē: “Aje ywete Jesu Kiristu rè ajirovijatà aiko”, pejē mijā. Aja paire tè aje pejirovija ee peiko mijā. Ajawyi tè Janejare'e o'Āg ome'ē maevo pejē.

⁶Pejapyaka katu ikō eayvu rè nē! Kee e'i ojikusywa Janejare'e kareta rè tãmō Aparão rewarà rè: “Janejare'e, ‘Kee oroerekotà’, e'i ijupe remē,

Aparão, 'Aje ywete a'evotà', e'i ojirovija ee. Ajawyi Janejare'e, 'Ivo katu mǎ'ẽ tẽ àwĩ', e'i ijupewarà mō", e'i ikusiwa maekwerà.^j ⁷Ajawyi tāmō Aparão reruparà mō tijaiko ipi. Janejare'e rẹ̀ tijajirovija ywete jaiko. A'evo jaiko remẽ tẹ̀ Janejare'e, "Aparão jeapyrere'e rōmō pejẽ", e'ità jane ãmẽ. Juteu rōwã mǎe kō pẹ̀ ve aepe e'ità ãmẽ. A'evoa tapekuwa ky'y.

⁸Ajawyi Juteu rōwã mǎe kō ojirovija ee weako'i rōmō remẽ, Janejare'e ivo katuay mǎe kō rōmō tẹ̀ wereko kō ipi ky'y. Ojikuwapa amǎtejẽ a'evoa emikusiwarerà rupi. Ajare tāmō Aparão pẹ̀ kee e'i amǎtejẽ karamoe remeve: "*Pirujẽ yvy wǎnà kō aauvaytà ereko kō nerupi tẹ̀*", e'i amǎtejẽ tāmō Aparão pẹ̀ karamoe remeve.^k ⁹Aepe jaa renu remẽ itōkō tāmō Aparão, "Aje ywete, a'evotà", e'i. Ajawyi tẹ̀ Janejare'e owaray Aparão wereko ipi. A'evo ve pirujẽ ojirovija ee weako'i rōmō mǎe kō owaray wereko kō ipi. Āwitō Aparão a'evo wereko, āwĩvo ve janerereko ipi.

¹⁰Āmō kō kee e'i ywe'e tite joupe: "Ije evote ivo katu aiko, Moisesi remikusiwarerà rupi katu aiko ipi rewarà mō", e'i ywe'e tite kupa ipi. Ajamǎẽ aepe e'i tite mǎe kō, nivoi mǎe kō tẹ̀ Janejare'e pẹ̀. Temiemavo rōmō sikaepo ekoità kupa. A'evoa rẹ̀ Janejare'e kee e'i ikusiwaokapa: "*Ava mō sō pirujẽ eayvu Moisesi pẹ̀ akusiwaoka maekwerà rupi katu noikoi remẽ, nivoi mǎe kō rōmōtã tẹ̀ eupewarà mō ekoì. Ajawyi, 'Temiemavoarà tẹ̀ ene', a'etã ijupewarà mō ãmẽ*", e'ipa ikusiwaoka maekwerà.^l ¹¹Aje, Moisesi remikusiwarerà rupi jaiko mǎ'ẽ rupi rōwã Janejare'e janerereko ivo mǎe kō rōmō ipi. Manyvo upi katu nijaiko'ãì kuwa ipi. "Upi katu taiko", ja'e ipe remẽ, jajavy jètã jaiko ãmẽ. Kee e'i ojikusisiwa Janejare'e kareta rẹ̀: "*Ojirovija ee weako'i rōmō iko mǎe kō tẹ̀ Janejare'e wereko ivo mǎe kō rōmō ipi*", e'i maekwerà.^m Aje, ojirovija ee mǎe kō pẹ̀ kōrijō tẹ̀ "ivo mǎ'ẽ" e'itã ipi. A'evoa sikuwapa.

¹²Na'evoi Moisesi remikusiwarerà rẹ̀ janerako'i remẽ. Upi tijaiko ikenẽ ãmẽ. Nojavvi 'ete mǎ'ẽ pẹ̀ kōrijō tẹ̀ "ivo mǎ'ẽ" eu kuwa mijã. Aje, kee e'i Janejare'e a'evoa rẹ̀: "*Eayvukwerà Moisesi pẹ̀ akusiwaoka maekwerà wryy pẹ̀ peikotã remẽ, upi katu tapeiko ikenẽ*", e'i maekwerà.ⁿ

¹³Ajamǎ'ẽ ava mō tāmō Moisesi remikusiwarerà rupi katu noikoi sire'egã ipi. Ajawyi a'e rẹ̀ sō janerako'i remẽ, "Temiemavo tẹ̀ ene", e'i kuwa Janejare'e janeupe ãmẽ mijã. Ajamǎ'ẽ Kiristu omo'y janeaiwererã wee remẽ, a'e tẹ̀ temiemavo rōmō omǎnō janerekovijarerã rōmō. Kee e'i Janejare'e kareta rẹ̀ maekwerà rupi katu a'evo: "*Ava mō sō yvyra jipokana rẹ̀ omǎnō remẽ, 'Temiemavoarã tẹ̀ tesō ene', eu ijupe*", e'i maekwerà rupi katu.^o Ajawyi "temiemavo" naoty'ãì janeupe ãmẽ ky'y, Kiristu rẹ̀ jajirovija janerako'i rōmō jaiko remẽ.

¹⁴Aje ywete Kiristu Jesu mǎnōa rupi Janejare'e janerereko katu oupewarã rã rōmō ky'y. Āwisō Juteu rōwã mǎe kō teipe pejẽ remẽ.

^j 3.6 Jinō. 15.6; Rom. 4.3; Tku. 2.23 ^k 3.8 Jinō. 12.3; 18.18 ^l 3.10 T.M. 27.26
^m 3.11 Apk. 2.4 ⁿ 3.12 Tek. 18.5 ^o 3.13 T.M. 21.23

Ajamã'ẽ ivo mãe kô rômô penereko ky'y. ãwitô Janejare'e owaray tãmô Aparão wereko ojirovija ee remê, ãwïvo yveve janerereko ky'y. Ajawyi o'Ag ome'ẽma janeupe, e'ipa maekwerà rupi katu, Kiristu rê jajirovija janerako'i rômô jaiko remê.

**“Moisesi remikusiwarerà vo rōwã Janejare'e ayvukwerà
Aparão pè ome'ẽ maekwerà”, e'i mǎ'ẽ**

¹⁵Eretārãgwerà kô, poromotekokuwa jêtà Janejare'e wayvu tãmô Aparão pè ome'ẽma maekwerà rê. Kee e'i maekwerà rã: “Aã yvy ame'êtà neupe. Nejeapyry rã pè teve”, e'ipa maekwerà rê. Aepo e'i paire, nomotee'ãi wayvukwerà, e'ipa rewarà mō. Kee a'e tarà mijê ijã'ã ikewarà rupi pejê, tapetekokuwa sa'u peiko ipi. Mōrijô rômô mirà kô remê, a'e kô ojiayvume'êtà tokusiwa kareta rê kupa. Werà kô okusiwa kareta rê, “Aje ywete aepo a'e”, e'i mǎ'ẽ mojikuwaparà rômô. Werà okusiwa paire, awyje a'evotà ekoi. Ava nomoje'o'ãi imotee erà kô iwyi ãmê ky'y. Nomokãjã'ãi werà kupa ky'y. Noinô sa'u'ãi teve ijapyrasa emikusiwarerà kupa ipi.

¹⁶A'evô ve Janejare'e wayvu ome'ẽma tãmô Aparão pè remê. “*Nejeapyry rã pè aepo a'e teve*”, e'ipa amãtejê. Peenu rã'ĩ esa! “Pirujê nejeapyrerà rã kô pè”, ne'i. “Nejeapyry rã pè”, e'i tê. Pe'ĩ jane mǎ'ẽ pè tê aepo e'i. Aparão jeapyry rã rômô Kiristu isakytà ojimojane. Ajawyi a'e pè tê aepo e'ipa amãtejê.^p

¹⁷Apota kee jaa rê ywesô poromotekokuwa aiko. Janejare'e wayvu ome'ẽ tãmô Aparão pè remê, aje ywete Aparão ojirovija ee. “Aje ywete, Janejare'e wayvu ome'ẽma ije maekwerà rupi katu ekoi'tà”, e'i Aparão. Tãmô Moisesi remikusiwarerà rupi ekoi rewarà mō rōwã Janejare'e wayvu ome'ẽ tãmô Aparão pè! Nisakyi ve tãmô Moisesi, a'evô ekoi remê. Tãmô Aparão ppy ekoi. 430 kwaray paire tê tesô Janejare'e wayvu ome'ẽ tãmô Moisesi pè ikusiwaoka.^q Aepo e'i paire nomotee'i wayvukwerà, tãmô Aparão pè e'i maekwerà. Tãmô Moisesi pè wayvu okusiwaoka remê, kee ne'i ijupe: “Eayvukwerà Aparão pè a'e maekwerà, a'e rupi naiko'ãi ky'y”, ne'i. Aepo e'i sô remê, wayvu omotee mǎ'ẽ vo tê kuwa mijã. ¹⁸Janejare'e remime'ẽ epy rê rōwã japyy ipi! Opo'ta tê poroereko katua rômô, okatuaya rupi tê ekoi ipi rewarà mō. Peja'a katu tãmô Aparão rê. A'e pè Janejare'e ojiayvume'ẽ remê, aje ywete wayvu rupi katuy ekoi ajaire. Kee ne'i rã'ĩ ijupe: “Eayvu rupi katu tapeiko ppy rã'ĩ”, ne'i ijupe. Ajawyi tãmô Aparão omoa'u jê wereko katua. “Aje ywete a'evô ererekotà, e'ipa rewarà mō”, e'i imoa'u upa. Ajawyi jakuwa a'evô jaiko remê, Janejare'e remime'ẽ japyytà, janerereko katua rômô. Ajawyi kee taoty e'ã: “Tãmô Moisesi remikusiwarerà rupi katu jaiko remê tê katu Janejare'e janerereko katu kuwa ipi, ãwisô ipyri tijaiko”, taoty e'ã.

19 Ava mō kee e'i kuwa eupe ãmẽ: “Manyvoa rã rômō pō kãramō sa'u Janejare'e omeẽ wayvu ikusiwaoka tãmō Moisesi pè ãmẽ”? e'i kuwa. Aepo jaa pè kee a'e kuwa: “Janejare'e opota jane kō tokuwa waiwererã kō reityypyypia tẽ, jaa tẽ okusiwaoka rã'ĩ”, a'e kuwa. Moisesi remikusiwarerã wryu pè jaiko jẽ jaiko ajaate Jesu uu. Tãmō Aparão jeapyrerã tẽ Jesu. A'e pewarã mō Janejare'e oporegeta amãtejẽ wayvu omeẽ tãmō Aparão pè karamoe remeve. ãmẽ a'e paire sitō Janejare'e wemikusiwarerã omeẽ wemígwai yvapewarã kō rupi tãmō Moisesi pè ky'y, tokusiwa imojisaoka mirã kō pè, ãwisō upi toiko kupa ky'y. 20 ãmẽ tãmō Aparão pè Janejare'e ywete wayvu ome'età remẽ, wemígwai yvapewarã rupi rōwã ome'ẽ. A'e ywete ome'ẽ Aparão pè. Pe'ite.

Manyvo wayvukwerã ome'ẽ mã'ẽ rewarã

21 Ava mō kee e'i kuwa ije mijã: “Manyvore pō Janejare'e wayvu ome'ẽma tãmō Aparão pe paire, wayvu jikusiwarerã ome'ẽ tãmō Moisesi pè, ivo tekoua rewarã?” e'i kuwa ije mijã. “Ojipy'amogeta motee sipō?” e'i kuwa ije mijã. Aepo jaa pè kee a'e kuwa: ãnĩ. Nojipy'amogeta moteei. Tãmō Moisesi remikusiwarerã rẽ sō janerako'i remẽ, nijajimokatuoka'ãi kuwa jaiko ipi. Nijanepija'ãi kuwa janejimomorijaua rã wyi. A'e rupi katu ekoia sō nivoi mãe kō py'a omokatu remẽ, Janejare'e ãmō nomuu'ãi kuwa janerereko katuarã mō mijã. [A'e Janerōvijã ywete rã.] Ajamã'ẽ nijaiko'ãi sire'e ijayvu rupi ipi.

22 A'evoa rẽ kee e'i Janejare'e ikusiwaoka: “Pirujẽ mirã kō nivoi mã'ẽ kasia pè tui”, e'i. Ajawyi japota ipe ivo jaikoa ipi remẽ, nivoi jẽ jaiko ipi. Nijanekasi janeaiwererã reityypyypia rẽ jaiko. Ikasiay janeupe iko. Ajawyi Jesu Kiristu rẽ jajirovija janerako'i rômō remẽ tẽ katu janerakyitã nivoi mã'ẽ kasia po pe wyi ipi, kee e'i maekwerã rupi katu tẽ: “Epyri tekou pyau ame'età”, e'i maekwerã rupi katu tẽ a'evō janerereko ipi.

23 Janejare'e nomojikuwaokaive wayvu e'eay Jesu rewarã jane kō pè remẽ, ijayvukwerã Moisesi pè ome'ẽ maekwerã janererekoarã rômō ekoi. A'e rupi ivo tekoua jakuwa, upi tijaiko sa'u ãmẽ. A'evō janerereko ajaate Jesu Kiristu rẽ jajirovija kuwa jaiko ky'y. 24 Ja'yry rerekoa rẽ tẽ poromosã'ãgatã pemotekokuwa rômō ãmẽ. Awitō ja'yry kō nomãrãkuwai iko ipi. Ajawyi jareko kō janepyri imotekokuwa kō ipi. Nãwĩvoi sō remẽ, notekokuwa'ãi kuwa iko kupa. Nomãrãkuwa'ãi kuwa teve ãmẽ kupa. ãwĩvo ve jane jaiko. Nomãrãkuwai mã'ẽ vo 'ejẽ Janejare'e pè jaiko ipi. Ajawyi wayvu ivo tekoua rewarã ome'ẽ rã'ĩ janererekoarã rômō. A'evō Janejare'e janerereko, ajaate janerereko katuarã ovãema ky'y. A'e Kiristu, janerereko katuarã rômō ekoi. A'e rẽ jajirovija remẽ tẽ katu Janejare'e janeporijauesa ky'y, ãwisō kee te'i janeupe: “Ivo mã'ẽ tẽ ãwĩ. Ajawyi epyri toiko karuaru iko”, te'i janeupe ipi. 25 Janejare'e omojikuwaokapa wayvu katu jane age'e ky'y, Kiristu rẽ jajirovija mã'ẽ rewarã. A'evō Moisesi remikusiwarerã janererekoarã rōwã ky'y, Kiristu ovãema rewarã mō.

“Janejare'e ākarāgwerà rōmō peiko ky'y”, e'i mā'ē

²⁶Ajawyi kee a'e pejē. Kiristu Jesu rē pejirovija ky'y rewarà mō sitō, age'e remē Janejare'e ākarāgwerà rōmō pirujē peiko ky'y. ²⁷Pejimojāmori remē, kee jaa tē a'evoa: “Kiristu reve kōrijō tē aikotā ky'y”, jaa tē pemojāmoriā. Janejare'e pemojimo'ypa ee, eevejē tapeiko ky'y. Ajawyi awyje ijupewarà kō rōmō tapejikuwa peiko ky'y. Ivo jē tapeiko ky'y. ²⁸Aje, pe'ipyte rōmō jaiko Jesu Kiristu koty rewarà kō rōmō ipi. Kee ne'i Janejare'e: “Juteu tē āwī kō” ne'i janere omājā. Āmō, kee ne'i Janejare'e omājā: “Āmō kō tē āwī kō. Juteu rōwā mae kō tē āwī kō”, ne'i teve. [Ojevo jē jaiko Janejare'e pē ky'y, Kiristu Jesu rē jajirovija mae kō rōmō.] Āmō, “Temīgwai kō tē āwī kō” ne'i. Āmō, “Ovote ekoi mae kō tē āwī kō”, ne'i teve. Āmō, “Kwaima'e kō tē āwī kō. Āmō, wāivigwerà kō tē āwī kō”, ne'i teve. Ojevo jē jaiko ijupe, Kiristu Jesu revejē jaiko mae kō rōmō jaiko ky'y rewarà mō. ²⁹Kiristu revejē peiko remē, aje ywete tāmō Aparāo jeapyrerà kō rōmō tē pejē peiko ky'y. Ajawyi Janejare'e ikatuay penerekotā, tāmō Aparāo pē e'i maekwerà rupi katu.

Janejare'e ākarāgwerà rōmō jaiko ky'y remē

4 ¹Āmō kee a'e sa'utā teve pejē pemotekokuwa rōmō. Tuu sō omānō remē, ima'ekwerà opyta ijākarāgwerà kō pē ipi. Ajamā'ē ija'yri sō ta'yry remē, nopyy'āive uu ma'ekwerà. Kāramō tē opyytā, ojimovijapa remē tē. Ajawyi nopyyive remē, temīgwai vo 'ejē rā'ī ekoi ipi. Ajawyi uu moma'ekwerà jarā rōmō ipe ta'yry remē, nojimovijapaive remē a'e rōmō rōwā jē ekoi. ²Ajamā'ē natui ky'y remē, āmō kō po pē tē ojimovijapa rā'ī iko. Werekōarā ayvu rupi toiko teve iko ikenē, uu rekovijarerà rōmō. Āmō, ta'yry movijaarerà tuu amyry moma'ekwerà rē omā'ē jē rā'ī teve, ta'yry ojimovija puku pē. Tuu ayvukwerà rupi ta'yry ojimovijapa pe'ī imoma'ekwerà rē omā'ē jētā rā'ī iko.

³Āwīvo jane, ta'yry vo 'ejē jaiko mijā. Yvy pewarā tekokuwaa rupi kōrijō jaiko ipi mijā. Āmō, ājāgai remimotarā rupi jaiko, nisirovija ywe'ei Janejare'e remē. ⁴Āmē okwapa sikaepo a'evoa 'arā ky'y remē, amē si Janejare'e omojisaoka Wa'yry ky'y. Omuu yvy pē tojimojane. Jane tē iij mā'ē rōmō omojisaoka tisaky. Juteu rōmō teve omojisaoka tisaky. Ajawyi orerāmōi Moisesi remikusiwarerà wryy pē rā'ī ekoi. ⁵Janejare'e opota wākarāgwerà kō rōmō janerereko ky'y. Ajawyi Wa'yry omuu tijanerekyi Moisesi remikusiwarerà rerovijaa kasia wryy kyty wyi, āwisō temiemavo kō rōwā tijaiko ky'y.

⁶Janejare'e penereko wākarāgwerà kō rōmō remē, Wa'yry 'Āg tē tesō omuu pepy'a pupe tojimoena. I'Āg rupi tē jakuwa aje ywete Janejare'e ākarāgwerà rōmō jaiko. I'Āg janemo'eoka “Papa!” tija'e Janejare'e pē ipi. ⁷Ajawyi kee a'e pejē. Temīgwai vo rōwā Janejare'e penereko ky'y.

Wākarāgwerà kō rōmō tē penereko ky'y. Ajawyi pirujē wākarāgwerà kō pē wemime'ē ārā ome'ētā pejē.⁷

“Tapejirojivy ywe'e tite e'ā peiko”, e'i mǎē

⁸Pejē Juteu rōwā mǎē kō. Aje karamoe remē napekuwaive Janejare'e mijā. Pejarā rǎ'āga kō po pē peiko ywe'e tite ipi mijā. A'e kō ayvu rupi peiko ywe'e tite ipi mijā. Nikasi mǎ'ē a'e kō. Manyvoa rǎ rōmō rōwā a'e kō ekoi. ⁹Age'e remē, pekuwa ipe Janejare'e ky'y. Janejare'e ve pekuwa teve. Āwīvoa ywesō ikatu ipe pejē. Ajamā'ē pepota jē tesō ity. Pejijrojivy mijē ywe'e tite aekwerà kyty peiko! Napepota'āi kuwasi ājāg kō rekoa rupi peiko mijā! Napepotai kuwasi ājāg kō remīgwai rōmō peiko mijē! ¹⁰Kee pejē ywe'e tite: “Japota Janejare'e morya rē jaiko remē, Juteu kō vo ywete tijaiko ikenē,” pejē ywe'e tite. “Jimoava 'arà remē upi upi jaja'a ee jaiko. Jay pyau upi upi teve jaja'a ee jaiko. Āmō, Juteu kō remija'a kō rē jaja'a teve jaiko. Wāisō jaiko. A'evo jaiko remē tē Janejare'e orytā janere”, pejē ywe'e tite peiko. ¹¹A'evo sō peiko ipi! Ajipy'amopirai ywete pene aiko! Ajawyi epy'a jikōtevē tesō pene aiko. Poromotekokuwaway ipe aiko mijā. Poromotekokuwa pānē tē sipō penereko?

¹²Apota katu evo jē peiko mijā, eretārāgwerà kō. Apota Kiristu rē pejirovijaa rupi katu kōrijō tē tapeiko, penako'i rōmō. Āwitō pevo aiko pepytery pē aiko remē, epota katu pekupa mijē. Tāwīvo pejē age'e remē.⁵ ¹³Kee jaa wyi tapenearai e'ā peiko ky'y. Manyvo rewarā mō rōwā Janejare'e ayvu amojenu ypy pejē maekwerà rē tapeja'a jē peiko! Etekorā itōkō pepyri aju remē. Ajawyi tē itōkō amojenu ijayvukwerà peupe ipi! ¹⁴A'evo aiko remē itōkō, nereityi tesō pekupa mijā. Napemā'ē tei teve itōkō ere! Āwisō ja'a katua rōmō rōwā etekorā mijā remē, napejiwarui ewyi peiko. [Āwīvo ipe aiko remē, “Tutene upa”, napejēi ije.] Aje, Janejare'e remīgwai yvapewarā vo 'ejē tesō erereko pekupa mijā. Āwitō Kiristu Jesu pereko katu kuwa, āwīvo tesō itōkō erereko katu pekupa mijā. ¹⁵Penoryvay itōkō ere mijā! Ije āmē kee a'e peupewarā mō: “Itekorā sō erea kō remē, wea rekyia okuwa sō kupa remē, ojiaekyia kuwa erea rōmō kupa mijā!” a'e peupewarā mō mijā. Age'e pejimotee tesō ky'y! ¹⁶Āwisō peāpā rōmō rōwā ipe ije remē, peāpā rōmō jē erereko pekupa ky'y. Manyvore pō āwīvo erereko pekupa? Aje ywete mǎ'ē tē amome'u rewarā mō sipō āwīvo erereko pekupa ky'y? a'e pejē.

¹⁷Aje ywete, ije poroauway penereko ipi. Na'evoi pepytery pewarā kō. A'e pemoe'e rǎ'āga mǎē kō. A'e kō penau maevo sō tite tē kupa. Ajamā'ē nivoia rupi tē poromo'e rǎ'āga iko kupa ipi. Opota tē ereityoka peupe kupa mijā. Opota ipe āwitō erau pekupa, āwīvo peau kō mijā. ¹⁸Apota ipe

^r 4.5-7 Rom. 8.15-17 ^s 4.12 Pauru opoipa tāmō Moisesi remikusiwarerà wyi, āwisō Juteu teipe remē.

Janejare'e ayvu rupi katu peiko ipi mijã. Ije pepyri aiko remẽ kōrijō rōwã a'evoa apota. Ke'ĩrōwã aiko pewyi remẽ teve apota ãwĩvo tapeiko.

¹⁹Eremiau kō tẽ pejẽ, eãkarãgwerà vo 'ejẽ pejẽ peiko. Kee a'e pejẽ. Ja'yry ray vo tesō epy'a pẽ emomoriãua penewarà rōmō. Ja'yry ray vo tesō eray nopi'ãĩ teve, apota ywete Kiristu rẽ pejirovija ywete penako'i rōmō peiko rewarà mō. ²⁰Age'e apota ipe mokopeaju pepyri mijã. Apota ipe ikatusa rupi aporegeta peneve mijã. Ajipy'amopirai tesō pene aiko ipi.

Tãmō Aparão ra'yry kō rẽ tẽ poromosã'ãgã mãẽ

²¹Mokoi, Moisesi remikusiwarerã rẽ pepota ywe'e tite penako'i peiko! Aje rōwã, napekuwa ywe'ei Moisesi remikusiwarerã peiko! ²²Kee e'i ikusiwa: "Aparão mōrijō rōmō ta'yry kō. Pe'ĩ emĩgwai ai memyry, Aga eu ijupe mãẽ memyry. Isimãeu eu erã pẽ mãẽ a'e. Aga emĩgwai teipe mijã. ãmō, erekware'e Sara memyry. Isaki eu erã pẽ mãẽ." ²³ãmẽ emĩgwai ai memyry jane e'e ra'yry rōmō kōrijō tẽ ekoi. [Aã jane age'e, ãwĩvo tẽ ekoi.] ãmẽ erekware'e imemy remẽ, Janejare'e ayvu rupi tẽ imemy ky'y. Kee e'ipa amãtejẽ Janejare'e ijupe: "Nererekwarã isa'imã wete ipe remẽ, imemy jẽtã nera'yry rōmō", e'ipa.

²⁴A'evoa mojikuwaparã rōmō tẽ kee a'e. Mōrijō rōmō wãivĩ kō, ivo ve mōrijō rōmō Janejare'e wayvu ome'ẽ mãẽ vo 'ejẽ ekoi. Sinai vytyrãpyte 'aryvo tãmō Moisesi pẽ wayvu ome'ẽ remẽ, "Pirujẽ neayvukwerã rupi katu oroikotã", e'i epe ijupe kupa. A'e Moisesi remikusiwarerã rẽ eako'i mãe kō, tãmō Aparão remĩgwai ai memyry vo 'ejẽ ekoi. Aga memyry vo 'ejẽ ekoi kupa. Temĩgwai karuarua vo 'ejẽ ekoi kupa. ²⁵A'e Sinai vytyry Arapia vyv pẽ tẽ tui. A'e rẽ jaja'a Aga rẽ jaja'a remẽ. Ajawyĩ age'e remẽ Moisesi remikusiwarerã rẽ eako'i mãe kō, Aga memyry vo 'ejẽ ekoi kupa. Temĩgwai karuarua rōmō ekoi kupa. A'e kō vo 'ejẽ Juteu kō ekoi, Jerusarẽ taa wãnã kō. A'e kō pawete temĩgwai karuarua rōmō ekoi kupa.^t

²⁶Ajamã'ẽ ãmō tena uve, Jerusarẽ yva pewarã. A'e janerena e'e tẽ. A'e pẽ jaku maevo sō tite jaiko, tãmō Aparão rerekware'e memyry vo 'ejẽ jaiko remẽ. Janejare'e janerereko wãkarãgwerã kō rōmō. Janerereko takatua rupi janerereko ipi. Moisesi remikusiwarerã rupi jaiko rewarã mō rōwã a'evõ janerereko. Jajirovija ee ky'y janerako'i rōmō jaiko rewarã mō tẽ a'evõ janerereko. Janeatyrytã Jerusarẽ yva pewarã pẽ jaiko.^u ²⁷Kee e'i ojikusiwapa Janejare'e kareta rẽ aepe jaa rẽ:

"Ene, wãivĩ nimemy'ãĩ mã'ẽ vo teipe ene mijã.

ãmō, nimemy ray'ãive mã'ẽ vo teipe teve ene neiko mijã.

Temimoikwerã vo teve ipe ene neiko mijã.

Ajamã'ẽ taneroryvay neiko ky'y. Ene ywesõtã nerorytã neiko omẽnã revejẽ ekoi mã'ẽ wyi.

^t 4.25 Epr. 12.18-21 ^u 4.26 Isa. 54.1; Epr. 12.22-24; J.Jim. 3.12; 21.1-7

Ene ywesõtà neroryvaytà wãivĩ imemy ratyray mã'ẽ wyi neiko",
e'i amãtejẽ maekwerà rupi katu tẽ jaikotà.

²⁸Eretãrãgwerà kô, kee a'e mã'ẽ rẽ peja'a. "Aje" tãmõ Aparão e'i Janejare'e ayvukwerà pè ipi. Ajawyi aekwerà rupi katu tãmõ Isaki isaky. Ajawyi Isaki vo 'ejẽ jane jaiko. Janejare'e 'Ãg wyive janesakya mã'ẽ vo 'ejẽ jaiko ijupewarà mõ, ijayvu katu rupi tẽ. ²⁹A'e jane wyi tẽ isaky maekwerà tẽ werõarõ Janejare'e 'Ãg kasia rupi isaky maekwerà. Ãwĩvo ywe'e age'e remẽ. Ajawyi mirà kô ovote okasia rupiwarà kô janererõarõtã iko. Omowasuoka ipetã jane kupa. ³⁰Ajamã'ẽ kee e'ipa Janejare'e tãmõ Aparão pè: "*Neremĩgwai ai emoisyry, imemyry revejẽ. Ãwĩ memyry nemoma'ekwerà jarã rômõ rãwãtã ekoi. Nererekware'e memyry tẽ ijãrã rômõtã ekoi*", e'ipa Janejare'e Aparão pè." ³¹Ajawyi kee a'e pejẽ, eretãrãgwerà kô. Temĩgwai ai memyry vo 'ejẽ rãwã jaiko, tãmõ Moisesi remikusiwarerã rẽ nijanerako'i rewarã mõ. Erekwere'e memyry vo 'ejẽ tẽ jaiko, "aje" ja'e Janejare'e ayvukwerà pè rewarã mõ. Jajirovija karuaru Janejare'e rẽ janerako'i rômõ jaiko ipi.

"Tapejimokasi iko peiko tẽ peiko mã'ẽ rupi ky'y", e'i mã'ẽ

5 ¹Aje, Kiristu janerereko mã'ẽ nomowaypei jane ky'y. Tãmõ Moisesi remikusiwarerã kasia pupe rãwã jaiko ky'y. Ãwĩvoa kasia pupewarã rômõ rãwã jaiko ky'y. Ajawyi jaiko tẽ jaiko ky'y. Ajawyi, tapejimokasi ikõ peiko ivo peiko mã'ẽ rẽ ky'y nẽ, a'e pejẽ. Moisesi remikusiwarerã rupi tekoua rẽ ikõ tapejipy'amogeta ywe'e tite e'ã peiko ky'y nẽ. "Ãmẽ tẽ janekatutã Janejare'e pẽ jaiko", tapejẽ ywe'e tite e'ã peiko. Aepo pejẽ sõ remẽ, Moisesi remikusiwarerã kasia pupewarã vo 'ejõtã pejẽ ãmẽ. Manyvo napereko kuwa'ãi Janejare'e mory, pejimokasiay ipe upi katu peikoa rẽ peiko remẽ!

²Pejapyaka ikõ eayvu rẽ ajawyi esa nẽ! Ije Pauru, kee a'etã pejẽ. Poroemosĩpire'ooka mãe kô perovija sõ pejiemosĩpire'o rômõ remẽ, kee jaa tẽ a'evoa: "Nikasi Kiristu erereko katuarã rômõ", jaa tẽ a'evoa. [Aje, a'evõ peikoa rupi napemory'ãi Janejare'e ãmẽ peiko.]

³Aporegeta tarã mijẽ tapekuwa katu. Mã kwaima'e mõ pẽ ve a'e te'itõtã. Pejiemosĩpire'o sõ pejimojuteu remẽ, ikatu ipetã pejẽ. Ajamã'ẽ pirujẽ Moisesi remikusiwarerã rupi katu peiko remẽ kãrijõ tẽ ikatu kuwa pejẽ mijã. Napejavyi 'eteay remẽ tẽ ikatu kuwa. ãmẽ naperovijai sire'e sikaepo remẽ, penako'i pãnõtã ee peiko ãmẽ. ⁴Kee pejẽ sõ remẽ, "Moisesi remikusiwarerã rupi aiko. Ajawyi ekatutã tẽ Janejare'e pẽ", pejẽ sõ remẽ, pepoi ywe'e titõtã Kiristu rẽ pejirovijaa wyi ãmẽ ky'y. Ivo pãnõtã tẽ peiko ãmẽ ky'y. Kiristu reve rãwãtã peiko ãmẽ. Janejare'e napeporijauesã'ãi ãmẽ.

v 4.30 Jinõ. 21.10

⁵Na'evoi jaiko ajamã'ê. Jesu Kiristu rè janerako'i jaiko. Ajawyi Janejare'e janerereko katutà. Janerereko katua rã siārõ jê jakupa remê, i'Āg janemokasioka jê janerereko rã'ī, siārõ puku pe'ī. ⁶Kiristu Jesu revejê jaiko ipi remê, nimanyvoi jajiemosĩpire'o ipi remê. Ivo ve nijajiemosĩpire'oi remê, nimanyvoi teve. Kiristu rè janerako'i jaiko remê tẽ katu ikatu Janejare'e pẽ jaiko ipi. A'evo jaiko remê, jajiauvey teãmãtã jaiko. A'evo jajikuwatã Janejare'e rè jajirovija mãe kō rōmō jaiko.

⁷Ajawyi kee a'e pejê. Pejimokasiay itōkō Janejare'e rè peiko mijã! Ava ayvu rupi ywete pōkō ayvu aje ywete mã'ê wyi pepoi tite? ⁸Janejare'e ayvu rupi rōwã a'evo ywe'e tite peiko! Janejare'e tẽ pepyteporo wãkarãgwerã kō rōmō penereko.

⁹Kee a'e. Pão rè tẽ poromosã'ãgatã tapetekokuwa sa'u. Kejavõigã teipe jainō pão jimovororo mã'ê moje'a je'a ipi, pão jainõtã remê. Ajamã'ê pirujê pão rã rupi ojimosãi, pão morurua rōmō ipi. Āwīvo ve ivo e'ãã poroporakapa poroerokwa ipi. Āwīvo remê, ajaire jane kō pirujê nivõ'ãi ekoi ãmê ky'y." ¹⁰Ajamã'ê akuwa pejimo'y jêtã Janerõvijã ywete rè pejirovija rōmō peiko. Janejare'e pemokasitã tapejirovija jê ee peiko. Ajamã'ê ava mō sō pemo'e rã'ãga Janejare'e ayvu rè remê, Janejare'e wemavotã ity oo ãmê apijarã. Aepe akuwapa.

¹¹Eretãrã kō, ãmō kō kee e'i tite eupewarã mō ipi: "Pauru mirã kō wemosĩpire'ooka ipi", e'i tite. Emomorijautarã kō tẽ aepe e'i kupa. Aje rōwã aepe e'i kupa. Aje sō remê, aã Juteu kō nojikō'õ'ãi kuwa ere mijã. Aje, kee a'e kōrijō ipi: "Aje ywete Kiristu omãnō vyvra jipokana rè janeaiwererã repykarã rōmō. Ajawyi Janejare'e penereko katutã pejirovija ee remê", a'e kōrijō ipi. ¹²Nikatui aepe e'i ije mãe kō, a'e pejê. Ajamã'ê eupe kee ikatu kuwa. Āwī pejiarĩ penereko mãe kō ovote tojieta e'e amãtejê kupa, ajawyi! a'e pejê.

¹³Ajawyi mokoi, eretãrãgwerã kō, pejimoripeokapa maekwerã kō! Janejare'e okasia ome'ẽma pejê, ãwisō ayvukasia pupe rōwã tapeiko ky'y. Ajamã'ê tapetekokuwa jê ikō peiko nẽ. Tapejimoripeoka e'ã ikō peiko ipi nẽ! Kee taoty e'ã ipi: "Janejare'e okasia ome'ẽ ije, eremimotarã rupi taiko ipi", taoty e'ã. Aepe pejê sō remê, manyvo napereko'ãi penemimota ai wyi pepoi. Ajawyi aepe tapejê tite e'ã peiko ky'y. Tapejiauvey kōrijō ojeeve peiko ky'y. Āwīvo remê teve, ojipo pẽ pejipãtavõtã pejimokasi jê rōmō peiko ãmê. ¹⁴Ajare kee e'i Janejare'e ikusiwaoka Moisesi pẽ: "Āmō kō tapeauvey. Āwitō pejiauvey peiko, tãwīvo ve tapeauvey kō", e'i maekwerã.^x Āmō kō peauvey remê, pirujê emikusiwarerã rupi katu tẽ peiko teãmãtã peiko ãmê. Ajawyi aepe a'e pejê.

¹⁵Tapejimoemija e'ã ojee peiko ky'y, a'e pejê. Tapejimoane'e e'ã peayvu ai rè peiko. Oterê jê poroauvaya rupi tapeiko ky'y. Āmê tẽ napejimoai'ãi ojee peiko.

w 5.9 1Kor. 5.6 x 5.14 J.K.R. 19.18

“Janejare'e 'Āg remimota janeremimota vo rōwā”, e'i mā'ē

¹⁶ Apota kee a'e pejē. Tapepota tē ikō Janejare'e 'Āg penerekoarā rōmō nē, a'e pejē. “Hoō” tapejē āmē ijupe. I'Āg pemotekokuwatā āmē. Āwīvo peiko remē, penemimota ai rupi napeiko'āi āmē ky'y. ¹⁷ Janeremimotarā rupi katua rōwā Janejare'e 'Āg remimota. Ovo rupi teve ojwiyi. Ajawyi ojimoāpā rōmō maevo sō tite ekoi kupa. Janeremimota. Janejare'e 'Āg remimota. Ajawyi tapeiko e'ā ikō penemimota rupi ky'y nē, a'e pejē.^y ¹⁸ Janejare'e 'Āg tē penerekoarā rōmō ekoi ky'y. Ajawyi Moisesi remikusiwarerā kasia pupe napeikoi ky'y.

¹⁹ Agyvo wemimota aiwerā rupi ekoi mae kō ekoi ipi. Joe ojitupi iko kupa ipi. Nivoia rē oposiko iko ipi. Waiwererā rē nosītytyi tesō iko ipi. Āmō, joe oposiko iko ipi. ²⁰ Āmō, ojarā rā'āga jimoātāgwerā rē ojimory iko ipi. Āmō, jimārāerekoa rē oposiko iko ipi. Āmō, āmō kō rē ojimoāpā iko ipi. Āmō, joe ojikōō iko ipi. Āmō, ojimo'au ojee iko ipi. Āmō, ojimōarō ojikoty iko ipi. Āmō, “Ije rāgwe”, e'i ojipy'amogeta iko ipi. Āmō, āmō Jesu koty rewarā kō wyi ojimowaite e'yi iko kupa ipi. ²¹ “Ije rōwā sō”, e'i iko ipi. Ka'ua rē ywesō oryvay iko ipi. Āmō, oka'ua pē remē ijawiay iko ipi. Wāi wāisō wemimota aiwerā rupi ekoi mae kō ekoi ipi. Nomoōokai Janejare'e o'arā kty kupa ipi. Ajawyi kee a'e mijē pejē. Āwīvo tapeiko e'ā ikenē!

²² Aje, agyvo jaiko teāmā Janejare'e 'Āg janererekoarā rōmō ekoi remē. Jajiauvay teāmā ojeeve jaiko ipi. Janerory teāmā teve jaiko ipi. Ava mō janemoai remē, “awyjepa ky'y”, ja'e kōrijō jaiko ipi. Jajimory mijē ojee ajaire jaiko ipi. Āmō, jajimo'āgatu teve jaiko ipi. Āmō, mirā kō rē nijajikōtevēi jaiko ipi. Japorijauesa kō ereko ipi. A'evo ja'e katua ijupe. Āmō, poropopypy katuarā rōmō jaiko ipi. Āmō, ivo tekoua rupi tijaiko ipi. Āmō, temirovija rōmō jaiko ipi. ²³ Āmō, ikatusa rupi jaiko teve ipi. Āmō, ivoa rupi jajireko katu teve ipi. Wāi wāisō jaiko teāmā Janejare'e 'Āg janererekoarā rōmō ekoi remē. Okasia rupi i'Āg janereinō a'evo tijaiko teāmā jaiko. Āwīvoa rē naikoi 'ete ayvukasia mō, “Āwīvo tapeiko e'ā”, e'i mā'ē ky'y.

²⁴ Kiristu Jesu koty rewarā kō i'Āg kasia rupi oitypypyipa waiwererā ipi. Wemimota aiwerā wyive opoi kupa ipi. Āwī rapijarerā rē jamānō mā'ē vo 'ejē jaiko.

²⁵ Janejare'e 'Āg tē janemoigooka ipi. Āwī teve janererekoarā rōmō ekoi ipi. Ajawyi i'Āg kasia rupi ikō tijaiko ipi nē! ²⁶ Nikatui jajimoe'e tite ipi remē. Nikatui āmō kō sirōarō remē. Āmō, simoai teywete āmō kō remē. Āmō, jajimōarō āmō kō gyty remē. Wāi wāisō nikatui jaiko remē.

“Ojevo jē tijajimokasi”, e'i mā'ē

6 ¹ Ajawyi kee tapeiko, eretārāgwerā kō. Āmō Jesu koty rewarā kō mō waiwererā rē sō oposiko remē, tapemogeta kō ikō āmē ipi nē.

^y 5.17 Rom. 7.15-23

Oikopa pepytery pè Jesu rekoa rè otekokuwavy mǎe kō. Ajawyi a'e kō tē tomogeta kō ipi. Tapemokasi kō teve toityypyty jē waiwererà wyi kupa. Ikatusa rupi kōrijō ikō tapemogeta kō ipi nē. Kee a'e teve pejē. Tapetekokuwa teve ikō ivo katua peikoa rè nē, a'e pejē. Āmē tē pejē ve ājāgai rōvijā napemoai'āi 'ete penereko.

²Ava mō sō ojimomoriyauvy iko remē, tapepātavō ikō ereko ipi nē. Āwitō pānakō ipowiyjay remē, japātavō imovya rè, āwīvo tapejipātavō gatu peiko ipi. Āwīvo peiko remē, napejavy'āi Kiristu rekoa rupi tekoua āmē. Upi katu peikotā āmē ipi.

³Kee e'i teywete avakwerà ipi: “Ha! Jōvijā vo tē ije. Ajawyi ije ywesō ekatu āmō kō wyi!” e'i tite oupewarà mō ipi. Ajamā'ē aje rōwā aepo e'i mā'ē. Ovote ojimoripe iko. ⁴Pevote penekoa tapemosā'āga esa ereko, pejāvijō jē. Āmē ivo katu sikaepo peiko remē, tapeiko upi āmē. Āmē tē tapepy'a katu ivo peikoa rè peiko. A'evō remē tē ava mō kee ne'i'āi ojipy'amogeta: “Ije ywesō ivo aiko āmō kō wyi”, ne'i'āi āmē ipi. Āmō, “A'evō kuwasi aiko!” ne'i'āi teve ipi. ⁵Tapejireko katu Janejare'e rovake peiko, pejāvijō jē, a'e pejē.

⁶Ava mō Kiristu rekoa rè ojimotekokuwa iko remē, tokāte'ā e'ā omotekokuwaarerà pè ipi. Toja'a katu ee ipi.

⁷Āmō, kee a'e pejē. Janejare'e nojimoripeokai ipi. Janerekoa rupi katu janemoepy ipi. [Ava mō wemimota aiwerà rupi kōrijō tē ekoi ipi remē, Janejare'e noja'a'āi ee ipi. O'Āg remimota rupi ekoi mā'ē rè kōrijō tē Janejare'e oja'atā ipi.] ⁸Āwitō koo rè oposiko mā'ē wemitāgwerà'a tē opo'o ipi, oposikoa repykwerà rōmō. Āwīvo ve Janejare'e 'Āg kasia rupi poroereko katu mā'ē, Janejare'e remireko katu rōmō ekoi. Āwīvo ve wemimota ai rè ywesō oja'a mā'ē ojimomoriyautā. ⁹Ajawyi poroereko katua ikō tijanererekoiva e'ā ipi nē. A'evō jaiko remē ikatukwerà sipyytā epykwerà rōmō ajaire. Āwitō moma'eyva'a 'arā okwa remē, japo'o janeposikoa repykwerà rōmō, āwīvo.

¹⁰Ajawyi temiporijauesa kō rè jamā'ē remē upi upi sipātavō kō ipi. Tijanererekoiva e'ā a'evō jaikoa ipi. Jesu rè ojirovija mǎe kō ywesō tijareko katu ipi.

Kareta moawyjepaa

¹¹Aā kareta ije epo pè ywete akusiwa ajupa ky'y. Mititirōwā tē eremikusiwarerà! ¹²Kee a'e pejē. Poromo'e rā'āga mǎe kō opota tē ojimojisaoka pejē. Āmō, ojimoe'eoka peupe kupa. Opota kasiay si penemosipire'ooka kupa. Nopotai kee javo kupa: “Kiristu rewarà mō tē nomānō'āi māerā tē jane jaiko. Janeaiwererà repykarà mō omānō yvyra jipokana rè”, javo. Okyje aepo javo Juteu kō wyi. “Aje ipo” e'i sō kupa remē, ojimomoriyautā kuwa āmē kupa mijā. ¹³Ojiemōsipire'o mǎe kō teipe a'e kō Juteu kō rōmō ekoi. Ajamā'ē tāmō Moisesi remikusiwarerà ojavy jē

iko kupa, a'e rupi katu noikoi sire'e kupa rewarà mō. A'evo ipe ekoi kupa remē, opota jē penemosīpire'ooka kupa. Ajaire a'evo paire opota ojimoe'e penewarà mō kupa. Ajawyi tē a'evo ekoi kupa. Opota tē kee javo mirà kō reminu rōmō: “Oreayvu wenu kupa rewarà mō ojimojuteu iko kupa ky'y”, javo kupa.

¹⁴Ije āmē kee jaa rē kōrijō tē ajimoe'e. Janerōvijā Jesu Kiristu mǎnōa rupi erereko katua rē ajimoe'e aiko. Yvyra jipokana rē omānō maekwerà rē aja'a aiko. A'e rē kōrijō tē aja'a aiko ipi, a'e rupi tē erekoa pyaukwerà ome'ē ije rewarà mō. Ije napotai Jesu noerovijai mǎe kō remimotarà rupi aiko ky'y. Kiristu rē ajirovija kōrijō tē apota. Ivo ve noerovijai mǎe kō nopotai teve eremirovija, Janejare'e epy'amoteeoka rewarà mō.

¹⁵Ajawyi kee a'e pejē. Nimanyvoi jajiemosīpire'o remē. Nimanyvoi teve nijajiemosīpire'oi remē. Jajipy'amotee ivo tekoua rupi jaiko mǎ'ē ywesō ikatuay ipi. Āwīvo jaiko remē, janerekoa pyaukwerà rupi jaiko mǎ'ē tē jane. ¹⁶Ajawyi kee a'e pirujē pejē, Jesu rekoa rupi peiko mǎe kō rōmō. Janejare'e ikō tapepy'a mopiryvypy katu penereko ipi nē, a'e pejē. Āmō, tapeporijauesa teve ikō penereko ipi nē. Pirujē Janejare'e koty rewarà kō reve teve ikō āwīvo tapenereko nē.

¹⁷Kee a'e pejē ky'y. Ava mō temo'eai e'ā ky'y, jiemosīpire'oa rewarà rē. Ije epirà rē ajikuwapa Jesu remīgwai rōmō aiko. Takuru pē ejapi japi mǎ'ē kwarerà rupi ajikuwapa. Āmō, enōpā nōpāawerà renawerà rupi ajikuwapa teve. Āwīvoa rē āmō kō omā'ē remē sitō okuwa Jesu remīgwai e'e tē ije mǎ'ē kupa!

¹⁸Janerōvijā Jesu Kiristu ikō tapenereko katu okatuaya rupi ipi nē, a'e pejē, eretārāgwerà kō. [Awyjepa ky'y.]